

# Kerajaan sedia bincang cuti haji

um- 6/4/2007

KUALA LUMPUR 5 April - Kerajaan sedia membincangkan lebih lanjut cadangan memberi cuti bergaji penuh kepada pekerja Islam bagi mengerjakan fardu haji sekali seumur hidup.

Sambil mengakui cadangan itu baik, Timbalan Menteri Sumber Manusia, Datuk Abdul Rahman Bakar berkata, pandangan tersebut boleh dibincang pada masa depan.

"Bagaimanapun pada masa ini memang tidak ada peruntukan undang-undang khusus mengenai cuti haji. Namun begitu adalah tidak menjadi kesalahan bagi mereka mengerjakan fardu haji dengan menggunakan cuti tahunan atau cuti tanpa gaji.

"Bahkan sesetengah organisasi besar yang mempunyai Perjanjian Bersama (CA) ada memperuntukkan klausa mengenai perkara ini," katanya ketika menggulung titah uca-

pan diraja bagi kementeriannya di Dewan Rakyat hari ini.

Sebelum ini, Ahli Parlimen Muar, Razali Ibrahim meminta kerajaan mempertimbangkan supaya diwujudkan satu undang-undang bagi membolehkan umat Islam diberikan cuti penuh untuk mengerjakan haji.

Abdul Rahman berkata, dalam memper-

timbang cadangan itu, semua perkara harus diteliti bagi mengelak ia memberi kesan kepada iklim pelaburan dan ekonomi negara ini.

Mengenai usaha menggalakkan warganegara Malaysia yang berkepakaran di luar negara kembali ke dalam negara, beliau berkata, sehingga bulan lalu sebanyak 993 permohonan telah diluluskan.

"Sebanyak 485 permohonan telah dilulus dan bilangan pemohon lulus yang telah kembali ke Malaysia seramai 330 orang," katanya.

Beliau menambah, beberapa langkah penambahbaikan telah diambil termasuk melaksanakan permohonan melalui Internet, insentif dan memperluaskan maklumat berkaitan program ini.